

De decima domo.



**DECIMA** domus significat regnum, honores, dignitates, exaltationes, magistratus, dominia, magisteria, & matrem &c.

Primus dominus triplicitatis decimæ domus, si fuerit fortunatus & in bono statu, in ascendente, uel decima, natus habebit dominium, uel dignitatem à Rege, cum prosperitate. Si fuerit in malo statu, habebit impedimenta ex parte Regis, & erit contemptus.

Si fuerit secundus dominus triplicitatis in huiusmodi bono statu, natus erit foelix in operibus suis. Si in contrario statu, dic contrarium.

Tertius dominus triplicitatis huius, si foelix, & fortunatus fuerit, significat quòd natus erit nobilis, altus, laudatus &c. Si in diuerso statu fuerit, contrarium significat.

Pars regni in aliqua domorum Martis, si aspexerit eam Mars de bono, & forti loco, & ambo in locis altis Regum extiterint, & aspexerit eos Sol, & pars fortunæ fuerit in bono loco, fortunis eam aspicientibus, de bonis, & fortibus locis, natus erit dominus militum, & dux exercituum, & ibit cum militibus, & exercitibus preliatum cum inimicis regni, securus erit, ac boni consilij, in operibus suis uictoriosus, & foelix in suis prælijs, ac in eis sapiens, & mansuetus. Si ibi aspexerint infortunæ, erit inferioris gradus. Et si omnes hij significatores fuerint depressi, erit miles gregarius unius clypei dominus. Si fuerit hæc pars cum domino decimæ domus, uel unus eorum in ascendente, natus habebit dominium, & posse in pueritia sua. Si fuerit in Medio cœli, habebit illud in ætate media. Si fuerit in septima, in senio, similiter etiam in quarta domo.

Si fuerint pars operis & magisterij, & eius dominus fortunati, & in bono esse natus insinuabit facile se magisterijs, & operibus bonis. Et si fuerit in Geminis, uel Virgine, uel aliquo signorum lignificantium mores, & magisteria, natus erit laudatus in operibus, & factis manuum suarum, & si cum hoc habuerit aliquam commixtionem cum significatoribus domus substantiæ, lucrabitur inde magnam substantiam, si non, nihil lucrabitur inde. Quando pars hæc fuerit in una quarta figure, & eius dominus in altera, habebit magisterium suum in itineribus extra locum suum, ratione itineris. Et si dominus partis habuerit aliquam dignitatem in signo in quo fuerit, natus habitabit in illo loco, extra terram suam, in quo fuerit, & habebit uicinatē ibidem.

Pars foelicitatis, siue Iouis, significat euasionem, uictoriam, & defensionem, iustitiam, & patientiam, legem, & rectitudinem, ac prudentiam in factis eius, & iurisdictionem inter gentem, ac bonos fines in rebus, domos orationis, & res iustas sine deceptione.

Pars Matris significat esse matris, sicut decima domus huius partis, iudicium est idem cum parte patris &c.

De undecima domo.



**UNDECIMA** domus, significat amicos extra sanguinem, bonos fautores, fiduciam, & spem, & est domus fortunæ.

Si primus dominus triplicitatis huius undecimæ domus fortunatus, & receptus fuerit, natus habebit multos amicos cum magno emolumento. Si in contrario, erit solitarius, & ingratus.

Si fuerit secundus dominus triplicitatis huius fortunatus, natus erit diues, & honoratus. Si in diuerso statu, significat contrarium huius.

Tertius dominus triplicitatis huius foelix, natus habebit filios remansuros post eum.